



Na osnovu člana 57. stav 2. Zakona o profesionalnoj rehabilitaciji, osposobljavanju i zapošljavanju lica sa invaliditetom ("Službene novine Federacije BiH", br. 9/10), Parlament Federacije Bosne i Hercegovine je, na sjednici Predstavničkog doma održanoj 28. jula 2010. i sjednici Doma naroda održanoj 29. jula 2010., donio

ODLUKU

O OSNIVANJU FONDA ZA PROFESIONALNU REHABILITACIJU I ZAPOŠLJAVANJE OSOBA SA INVALIDITETOM

I. OPĆE ODREDBE

I.

Ovom Odlukom osniva se Fond za profesionalnu rehabilitaciju i zapošljavanje osoba sa invaliditetom.

II.

Naziv fonda glasi: Fond za profesionalnu rehabilitaciju i zapošljavanje osoba sa invaliditetom (u daljnjem tekstu: Fond).

Fond je javna ustanova koja ima svojstvo pravnog lica i upisuje se u sudski registar.

Rad Fonda je javan.

Sjedište Fonda je u Sarajevu.

II. DJELATNOST I SREDSTVA FONDA

III.

Fond obavlja sljedeće poslove:

provodi politiku razvoja i unapređivanja profesionalne rehabilitacije i zapošljavanja osoba sa invaliditetom, osim obrazovnih ustanova čija je osnovna djelatnost sticanje osnovnog i srednjeg obrazovanja;

finansira i sufinansira profesionalnu rehabilitaciju i osposobljavanje i zapošljavanje osoba sa invaliditetom;



finansira i sufinansira programe razvoja privrednih društava za zapošljavanje osoba sa invaliditetom i zaštitnih radionica;

finansira i sufinansira programe za održavanje zaposlenosti osoba sa invaliditetom;

nadzire ostvarivanje prava na novčanu nadoknadu i stimulans i korištenjem drugih sredstava Fonda;

vrši isplate novčanih nadoknada i stimulansa;

finansira i sufinansira programe za održavanje zaposlenosti osoba sa invaliditetom;

vrši refundaciju sredstava uplaćenih doprinosa, poreza na dohodak i dijela plaća za osobe sa invaliditetom zaposlene u zaštitnim radionicama;

provodi politiku razvoja i unapređivanje profesionalne rehabilitacije i zapošljavanja osoba sa invaliditetom;

vrši i druge poslove predviđene Zakonom i Statutom Fonda;

nadzire da li je pravilan obračun novčane nadoknade iz člana 53. Zakona i vjerodostojnost priloženih dokaza i drugih dokumenata.

IV.

Prihode Fonda čine:

sredstva iz budžeta Federacije Bosne i Hercegovine;

sredstva posebnog doprinosa iz člana 18. i 19. Zakona;

sredstva Federalnog zavoda za zapošljavanje u iznosu od 10% sredstava planiranih finansijskim planom Federalnog zavoda za zapošljavanje za aktivnu politiku zapošljavanja u tekućoj godini;

sredstva kantonalnih službi za zapošljavanje u iznosu od 5% sredstava planiranih finansijskim planom kantonalnih službi za zapošljavanje za aktivnu politiku zapošljavanja u tekućoj godini;

neurošena sredstva za posebne namjene iz člana 55. stav 5. Zakona;

drugi prihodi ostvareni na osnovu zakona i drugih propisa;

pokloni i pomoći u novcu od domaćih i stranih pravnih i fizičkih lica.



V.

Sredstva Fonda vode se na računu Fonda.

Fond donosi godišnji finansijski plan.

Godišnji finansijski plan sadrži prikaz prihoda po njihovom izvoru i plan korištenja sredstava po namjeni.

Fond podnosi Parlamentu Federacije Bosne i Hercegovine izvještaje o izvršenju finansijskog plana.

III. ORGANI FONDA

VI.

Organi Fonda su:

Upravni odbor, Nadzorni odbor i direktor.

Postupak imenovanja i razrješenja organa Fonda vrši se u skladu sa propisima o ustanovama, ministarskim, vladinim i drugim imenovanjima, Zakonom i općim aktom.

VII.

Organ rukovođenja Fondom je direktor Fonda.

Direktora Fonda imenuje Upravni odbor Fonda uz prethodno pribavljenu saglasnost Vlade Federacije Bosne i Hercegovine (u daljnjem tekstu: Vlada Federacije) na osnovu javnog konkursa objavljenog u "Službenim novinama Federacije BiH" i sredstvima javnog informiranja.

Direktor Fonda se imenuje na period od četiri godine i može još jednom uzastopno biti imenovan na tu funkciju.

Za direktora Fonda može biti imenovana osoba koja, pored općih uvjeta propisanih Zakonom o vladinim, ministarskim i drugim imenovanjima, ispunjava i sljedeće posebne uvjete:

VSS, završen pravni, ekonomski ili drugi fakultet društvenog smjera,

da ima najmanje pet godina radnog iskustva na poslovima rukovođenja,

da ima izražene organizacijske sposobnosti i sklonost za timski rad.



Ukoliko dva ili više kandidata budu u cijelosti ispunjavali sve kriterije za odabir, prednost će se dati osobi sa invaliditetom, u skladu sa članom 61. Zakona o profesionalnoj rehabilitaciji, osposobljavanju i zapošljavanju osoba sa invaliditetom.

Direktor Fonda vrši sljedeće poslove:

rukovodi Fondom,

predstavlja i zastupa Fond,

predlaže godišnji finansijski plan Fonda,

podnosi izvještaje o izvršenju finansijskog plana Fonda,

odgovoran je za zakoniti rad Fonda,

obavlja i druge poslove predviđene zakonom i općim aktima Fonda.

VIII.

Upravni odbor Fonda broji sedam članova od kojih su tri člana predstavnici organizacija osoba sa invaliditetom, koje su osnivači ili vlasnici ustanova i privrednih društava za profesionalnu rehabilitaciju i zapošljavanje osoba sa invaliditetom.

Članove Upravnog odbora imenuje Vlada Federacije, na osnovu javnog konkursa, u skladu sa Zakonom o ustanovama i Zakonom o vladinim, ministarskim i drugim imenovanjima.

Upravni odbor vrši sljedeće poslove:

donosi Statut Fonda,

donosi Poslovnik o radu Upravnog odbora,

donosi druge opće akte predviđene Statutom Fonda,

donosi godišnji finansijski plan Fonda,

vrši i druge poslove utvrđene zakonom i općim aktima Fonda.

IX.

Organ kontrole poslovanja u Fondu je Nadzorni odbor Fonda.

Nadzorni odbor Fonda broji pet članova.



Članove Nadzornog odbora imenuje Vlada Federacije, na osnovu javnog konkursa, u skladu sa Zakonom o ustanovama i Zakonom o vladinim, ministarskim i drugim imenovanjima.

Nadzorni odbor obavlja sljedeće poslove:

vrši kontrolu poslovanja Fonda,

analizira izvještaje o poslovanju Fonda,

vrši nadzor nad zakonitim utroškom sredstava Fonda, u skladu s finansijskim planom,

vrši i druge poslove utvrđene zakonom i općim aktima Fonda.

X.

Bliži djelokrug poslova i nadležnosti direktora, Upravnog odbora i Nadzornog odbora bit će utvrđen Statutom Fonda.

XI.

Osnovni opći akt Fonda je Statut.

Statut Fonda donosi Upravni odbor Fonda uz prethodnu saglasnost Vlade Federacije.

Statutom Fonda pobliže se uređuje:

djelokrug rada;

ovlaštenja i odgovornosti direktora Fonda;

ograničenja u pogledu sticanja, opterećivanja i otuđivanja nekretnina i druge imovine Fonda;

namjena, način raspoređivanja, odnosno korištenja sredstava Fonda;

javnost rada Fonda, saradnja sa državnim organima i drugim pravnim i fizičkim licima u ostvarivanju djelatnosti Fonda;

obavljanje stručnih, administrativnih i drugih poslova Fonda;

pitanja za koja je propisano zakonom da se uređuju Statutom;

druga pitanja od značaja za obavljanje djelatnosti i poslovanje Fonda.

Fond donosi i druge opće akte utvrđene zakonom i Statutom Fonda.



Upravni odbor dužan je donijeti Statut Fonda u roku od 30 dana, a opće akte iz prethodnog stava u roku od 60 dana od dana imenovanja.

IV. JAVNOST RADA FONDA

XII.

Rad Fonda je javan.

Fond će podnijeti Vladi Federacije i Parlamentu Federacije BiH izvještaj o radu i izvještaj o realizaciji finansijskog plana i programa za proteklu godinu u roku utvrđenom Statutom Fonda.

Fond o svom radu izvještava javnost pravovremeno i istinito na način određen Statutom Fonda.

Fond je dužan javnosti, ovlaštenim organima i pravnim licima koja obavljaju javne djelatnosti, na njihov zahtjev, pružiti informaciju o obavljanju svoje djelatnosti, posebno o načinu korištenja sredstava i postignutim rezultatima na unapređenju profesionalne rehabilitacije i zapošljavanja osoba sa invaliditetom, te omogućiti uvid u odgovarajuću dokumentaciju.

Fond može uskratiti davanje informacije, odnosno uvid u dokumentaciju ako je Statutom Fonda propisana kao službena ili poslovna tajna.

XIII.

Vlada Federacije će u roku od 30 dana od stupanja na snagu ove Odluke imenovati privremene organe Fonda i posebnom odlukom odlučiti o visini sredstava koja će se iz budžeta Federacije Bosne i Hercegovine uplatiti u Fond, kao inicijalna sredstva za početak rada Fonda.

XIV.

Nadzor nad korištenjem sredstava Fonda vrši Federalno ministarstvo finansija, u skladu sa zakonom.

Upravni nadzor nad zakonitošću rada i općih akata Fonda obavlja Federalno ministarstvo rada i socijalne politike i kantonalna ministarstva nadležna za poslove rada i socijalne politike, svako u okviru svoje nadležnosti.

XV.

Ova Odluka stupa na snagu narednog dana od dana objavljivanja u "Službenim novinama Federacije BiH".



PF broj 01-02-920/10

29. jula 2010. godine, Sarajevo

Predsjedavajući Doma naroda Parlamenta Federacije BiH, Stjepan Krešić, s. r.

Predsjedavajući Predstavničkog doma Parlamenta Federacije BiH, Safet Softić, s. r.